

Jauhi Budaya Lepak

Daripada Abu Said al-Khudri RA berkata bahawa Rasulullah SAW bersabda:

إِيَّاكُمْ وَالْجُلُوسَ عَلَى الطَّرِيقَاتِ قَالُوا: يَا رَسُولَ اللَّهِ، مَا لَنَا بُدٌّ مِنْ مَجَالِسِنَا، نَتَحَدَّثُ فِيهَا، قَالَ: فَأَمَّا إِذَا أَبَيْتُمْ فَأَعْطُوا الطَّرِيقَ حَقَّهُ قَالُوا: وَمَا حَقُّهُ؟ قَالَ: غَضُّ الْبَصَرِ، وَكَفُّ الْأَذَى، وَرَدُّ السَّلَامِ، وَالْأَمْرُ بِالْمَعْرُوفِ، وَالنَّهْيُ عَنِ الْمُنْكَرِ.

Maksudnya: “Awasilah kamu daripada duduk di tepi jalan. Para sahabat bertanya: Ya Rasulullah: Kami terpaksa berada di tempat duduk kami dan berbual di situ. Sabda Rasulullah: Jika kamu enggan, hendaklah kamu berilah hak jalan. Para sahabat bertanya: “Apa haknya. Sabda Rasulullah: Tundukkan pandanganmu, mencegah daripada perkara yang menyakitkan, menjawab salam dan melaksanakan amar makruf serta nahi mungkar.”

Hadis sahih ini *muttafaq alaihi*. Diriwayatkan oleh al-Bukhari (5875) dan Muslim (114)

Pedoman dan Iktibar Hadis

Antaranya:

1. Guru kami Syeikh Muhammad Soleh al-Uthaimin di dalam Syarah Kitab *Riyadh al-Solihin* berkata: Penggunaan lafaz **إِيَّاكُمْ** ini membawa maksud *ancaman dan larangan keras* iaitu aku memberi peringatan kepadamu supaya jangan duduk di tepi jalan. Disebabkan perbuatan tersebut membawa kepada terdedahnya aurat dan aib manusia yang lalu lalang di situ. Sehingga akhirnya boleh memburukkan maruah mereka dan kadang-kadang

membawa kepada umpatan, cacian dan penghinaan.

2. Justeru, Rasulullah SAW mengemukakan peraturan jalan atau hak jalan yang mesti ditunaikan oleh golongan yang berada di tepi jalan. Peraturan wajib yang disebut ialah:
 - Tundukkan pandangan.
 - Menahan daripada menyakiti.
 - Menjawab salam.
 - Amar makruf dan nahi mungkar.
3. Mengikut Kamus Dewan Edisi Keempat, *lepak* ialah *budaya atau tabiat yang merupakan amalan negatif di kalangan masyarakat seperti di kalangan remaja yang menghabiskan masa dengan duduk-duduk tanpa melakukan kegiatan yang berfaedah.*
4. Amat penting kita berakhlak dengan akhlak yang mulia walaupun ketika mana kita bersempang di wakaf atau tepi jalan. Inilah indahnya Islam yang meletakkan sesuatu akan haknya termasuk hak jalan supaya masyarakat menjadi harmoni dan selesa sesama sendiri.

Mutiara Hikmah

- ❖ **Pujangga berkata:** Orang yang menjauhi perselisihan, menjauhi sikap membanggakan diri sendiri, menjauhi sifat dusta, reda dengan takdir Allah dan menjauhi sifat dengki nescaya Allah jinakkan hati manusia kepadanya.
- ❖ **Pujangga berkata:** Siapa yang mengabulkan permintaan orang yang terhimpit dengan masalah, jika meminta pertolongan, yang menolong orang yang tenggelam jika menyeru dan yang akan menghapuskan kesusahan dari kita? Dialah Allah.

Kisah Teladan

Berikut ini adalah pesan dari Khalifah Umar bin Abdul Aziz (khalifah ketujuh dinasti Umayyah) yang keadilannya hampir sama dengan Khalifah Umar bin Khattab, bertujuan supaya kita tidak mudah tergoda untuk melakukan dosa. Pesan beliau iaitu “*Wahai sekalian manusia, janganlah kamu anggap kecil sesuatu dosa, selidiklah dan usahakanlah untuk mengikis habis apa-apa yang telah dilakukan dengan cara bertaubat (Allah SWT berfirman ertinya): Sesungguhnya perbuatan-perbuatan baik itu akan menghilangkan segala perbuatan-perbuatan jahat.*”

Itulah peringatan bagi orang-orang yang mahu berfikir. Seterusnya beliau berkata: Sia-sia dan rugilah orang-orang yang keluar dari rahmat Allah yang meliputi segala sesuatu dan dia telah mengharamkan mereka masuk syurga yang luasnya seluas langit dan bumi.

Ketahuiilah bahawa perasaan aman pada hari esok (hari kiamat) nanti tersedia bagi orang-orang yang takut akan Tuhan, iaitu orang yang suka menjual barang yang sedikit untuk ditukar dengan yang banyak, orang yang suka menukar yang fana dengan yang kekal. Pelaksanaan kewajipan dari waktu-waktu yang disebutkan itu tidak boleh diqadak. Hal ini kerana waktu itu terus berubah dengan ganti-ganti, dan jika sudah berubah atau berganti maka sudah tentu kewajipan yang mesti dilaksanakan pun akan berubah dan berganti.